



20. oktober 2009

Inatsisartut suleriaasianni § 36 immikkoortoq 1 naapertorlugu Naalakkersuisunut apeqquq imaattoq matumuuna saqqummiunniarpara.

Naalakkersuisunut apeqquq: Qilalukkanik Naalakkersuisut pisasseeqqinniarpaat?

(Inatsisartuni ilaasortaqaq Hans Enoksen, Siumut)

Tunngavilersuut: Upernavimmi eqqaanilu qilalugartassat tamarmik tassalu Qernertat, Qaqortallu pisassat tamakkerneqarput, tassalu aatsaat piniarneq aallartiinnartoq. Tassa naatsumik oqaatigalugu piniartorpassuit pisaqanngitsoortut qilalukkanik nunguussaapput, aammalu Upernavimmi eqqaanilu nunaqarfiit qilalukkanik ilaat anguneqanngitsulluunnit pisassat tamakkerneqarput, tamannalu piniartukkormiunut pingaartumik ilaqutariinnut pilersuisunut ilungersunartumik sunniuttussaavoq.

Piniartukkut atugaat ilungersunarluinnartut ukiaq-manna pitsaanerulaartumik inissisimassappata pinngitsoornani Qilalukkanik qaqortanik Qernertanillu pisasseeqqinnissaq saneqquneqarsinnaanngilaq. Avannaa kaperlakkiartorpoq, aammalu ukiaq-manna Naalakkersuisut puisit amiisa akiinik appaapput pissutsinik pitsaanerulersinngitsunik.

Piniartut oqaatigaat qilalugarpassuaqartoq tamannalu tunngavigalugu pisasseeqqinnissaq piartumik naammassineqartariaqartoq kissaatigissavara, tassami piniartukkormiut amerlasoorpassuit neqissaqarniarnikkut aningaasatigullu isertitassaminnik annaasaqartussanngorput pisassanik nunguussaanertik pillugu.

Taamatut tunngavilersuuteqarlunga Naalakkersuisut aperiniarpakka qilalugartassanik amerlanerusunik pisasseeqqinniarnersut Upernavimmut eqqaamiuinullu.